

Monseigneur Luis Secco na BON DIA ARUBA:

Iglesia Catolico lo keda para firme contra di matrimonionan entre personanan di mesun sexo

ORANJESTAD - Aruba ta un poblacion chikito, cu semper a para pa su principianan. Berdad ta cu mundo a evolucionar masha hopi mes y e evolucion aki a yega Aruba tambe. Un fenomeno cu mas y mas ta bin dilanti, ta e topico di "gay marriage" (matrimonio entre dos persona di e mesun sexo). Tin varios persona cu ta na fabor y otro nan, pa un of otro motibo, ta contra di e esaki. Ta conoci cu un Parlamentario di Aruba a contrae matrimonio cu un persona di su mesun sexo na Hulanda. Aruba ainda no ta asina leu cu un persona por casa cu un otro

persona di su mesun sexo, ya cu esaki no ta un ley ainda.

OBISPADO DI WILLEMSTAD

Den cuadro di esaki BON DIA ARUBA a tuma contacto cu maximo representante di Roma den nos region, cual ta Monseigneur Luis Secco, di Obispado na Willemstad, Corsou tocante e punto di bista di Iglesia Catolico. Segun Mg. Secco, Obispado y Iglesia Catolico lo keda defende matrimonio, segun ley di Dios. El a tuma nota cu varios Gobierno di mundo ta aprobando leyman di matri-

monio entre personanan di e mesun sexo. Mg. Secco ta di opinion mester keda monitor loke ta pasa riba islanan BES (Bonaire, Saba y Statia). Otro punto cu BON DIA ARUBA a puntra Mg. Secco, tabata tocante adopcion di un mucha di parti di un matrimonio homosexual. Esaki pa Obispo di Willemstad, ta algo absolutamente no permisibel. Tur persona cu ta proclama e creencia Cristian, mester para y defende Dios su creacion. Dios a crea homber pa muhe y vice versa. Mg. Secco a termina bisando cu mester respecta Dios su mandamentonan. □

Obispo di Willemstad, Monseigneur Luis Secco.

